

## DOMENIE V DI PASCHE

### Antifone di jentrade cf. Sal 97,1-2

Cjantait al Signôr une cjante gnove parcè che il Signôr al à fatis robonis; al à palesade la sô justizie in face di ducj i popui, aleluia.

Si dîs Glorie a Diu.

### Colete

Diu onipotent e eterni,  
rifornîs di un continui in nô il misteri di Pasche  
par che cul jutori de tô protezion a puedin rindi une vore  
e rivâ a la gjonde de vite eterne  
chei che tu ti sês indegnât di rinovâ cul sant batisim.  
Pal nestri Signôr Jesù Crist to Fi, che al è Diu  
e cun te al vîf e al regne dutune cul Spirtu Sant,  
par ducj i secui dai secui.

### PRIME LETURE At 6,1-7

A sielzerin siet oms plens di Spirtu Sant.

Dai Ats dai Apuestui

In chei dîs, biel che il numar dai disepui al cresseve, al nassè un rusin dai Eleniscj cuntri dai Ebreus, par vie che a vignivin metudis di bande lis lôr veduis te spartizion di ogni dì. Alore i dodis a clamarin la semlee dai disepui e ur diserin: «No va che nô o trascurin la peraule di Diu par stâ a dâ fûr robe. Pluitost, fradis, cjataitsi fûr fra di vualtris siet oms di buine reputazion, plens di Spirtu Sant e di sintiment, e ur darin cheste incariche. Noaltris invece o restarìn salts te preiere e tal predicjâ la peraule». La propueste i plasè a dute la semlee e a sielzerin Stiefin, om plen di fede e di Spirtu Sant, Filip, Procor, Nicanor, Timon, Parmen e Nicolau, proselit di Antiochie. Ur ai presentarin ai apuestui e lôr, dopo di vê preât, ur meterin lis mans sul cjâf.

E la peraule dal Signôr si slargjave simpri plui; il numar dai disepui al cresseve un stragjo a Jerusalem e ancje un biel trop di predis si jerin sometûts a la fede.

Peraule di Diu.

### SALM RESPONSORIÂL dal Salm 32

**R.** Voltiti viers di nô, Signôr: in te o metìn la nestre sperance.

**O ben:**

**R.** Aleluia, aleluia, aleluia.

Gjoldêt tal Signôr, int juste;

ai bogns ur sta di laudâlu.

Laudait il Signôr cu la citare,

cu la citare a dîs cuardis fasêti une cjante. **R.**

Parcè che la peraule dal Signôr e je juste  
e fedêl ogni sô vore.

Lui al ten pe onestât e pe dretece;

dal boncûr dal Signôr e je incolme la tiere. **R.**

Ve, il voli dal Signôr si poe sun chei che lu rispjetin,

sun chei che tal so boncûr a sperin,

par sfrancjâ de muart lis lôr vitis,

par tignîju in vite in timp di miserie. **R.**

### SECONDE LETURE 1 Pi 2,4-9

**Vualtris o sês la gjernazie sielte, i predis e i rês.**

De prime letare di san Pieri apuestul

Benedets, tacaitsi daprûf di lui, piere vive, butade di bande dai oms ma sielzude e preseade denant di Diu. Ancje vualtris, tant che pieris vivis, lassaitsi doprâ par fâ sù une cjase spirituâl, par jessi predis sants, in mût di podê ufrî sacrificis spirituâi che Diu al à agrât midiant di Jesù Crist. Di fat al è scrit: “Ve che jo o met in Sion une piere di cjanton, sielte, preseade, e chel che al crôt in jê nol restarà malapaiât”.

Onôr duncje a vualtris che o crodês: ma par chei che no crodin “la piere che i muradôrs le vevin butade di bande e je diventade un cjantonâl, un clap che si inçopedisi e une piere che e fâs colâ”.

Lôr si inçopedin parcè che no crodin a la peraule; al è il lôr destin. Vualtris invezit o sês la “gjernazie sielte, i predis e i rês, la int sante, il popul che Diu si è cuistât par che al conti lis grandis voris” di lui, che us à clamâts dal scûr a la sô lûs sflandorose.

Peraule di Diu.

**CJANT AL VANZELI Zn 14,6**

**R. Aleluia, aleluia.**

Jo o soi la strade, la veretât e la vite, al dîs il Signôr:  
nissun nol va al Pari se no midiant di me.

**R. Aleluia.**

**VANZELI Zn 14,1-12**

**Jo o soi la strade, la veretât e la vite.**

Dal vanzeli seont Zuan

In chê volte, Jesù al disè ai siei dissepui: «Il vuestri cûr nol à di conturbâsi. Crodêt in Diu e crodêt ancje in me. Inte cjase di gno Pari ind è tant puest, senò us varessio forsît dit che o voi a preparâus un puest? E cuant che o sarai lâ e us varai preparât un puest, o tornarai e us cjaparai sù cun me, par che o sedis ancje vualtris là che o sarai jo. E là che o voi, vualtris o cognossês la strade».

I dîs Tomâs: «Signôr, no savin là che tu vâs; cemût podino cognossi ancje la strade?». I dîs Jesù:

«Jo o soi la strade, la veretât e la vite. Nissun nol va al Pari se no midiant di me. Se mi vessis cognossût me, o cognossaressis ancje gno Pari, e za di cumò lu cognossês e lu vês viodût». I dîs Filip: «Mostrinus il Pari e nus baste». I dîs Jesù: «Dopomai che o soi cun vualtris e tu, Filip, no tu mi âs in mò no cognossût? Chel che mi à viodût me al à viodût il Pari. Cemût fasistu a dî: Mostrinus il Pari? No crodistu che jo o soi tal Pari e che il Pari al è in me? Lis peraulis che jo o dîs, no lis dîs di cjâf gno; il Pari che al vîf in me al fâs lis sôs oparis. Crodêtmî: jo o soi tal Pari e il Pari al è in me. Crodêt almancul in gracie des mê s oparis.

In veretât, in veretât us dîs: Chel che al crôt in me, al fasarà ancje lui lis oparis che o fâs jo e int fasarà ancje di plui grandis, parcè che jo o voi li dal Pari».

Peraule dal Signôr.

**Si dîs O crôt.**

**Su lis ufiertis**

Diu, che pal incuintri sant di chest sacrifici  
tu nus fasis vè part de tô divinitât uniche e infinide,  
danus, par plasê, di testimoneâ cuntune vite degne  
la tô veretât che o vin cognossude.

Par Crist nestri Signôr.

**Antifone a la comunion Zn 15,1.5**

Jo o soi la vît vere e vualtris i cjâfs,  
al dîs il Signôr;  
chel che al reste in me e jo in lui,

chel al bute une vore, aleluia.

**Daspò de comunion**

Signôr, ti preìn, cjale di bon voli il to popul  
e, daspò di vêlu inscuelât cui misteris dal cîl,  
dai di passâ de viere a la gnove vite.  
Par Crist nestri Signôr.